

Соколёнок



2/2018

март-апрель

# Лашын



БАЛАЛАР УШИН ЭКИ АЙДА БИР КЕРЕ ШЫГАТАГАН РЕСПУБЛИКАЛЫК ЖУРНАЛЫ



Художник Иса Хумаев







# ЮМАДЫНЪ КУЪНЛЕРИ...

ДУЪЙСЕМБИ куън  
Келип кала аьр заман.  
САБЛИ куъни  
Оны саклап турады.  
САЪРСЕМБИ куън  
Терезеден коьз салган,  
КИШИ юма  
Мен де бар деп карайды.  
ЮМА КУЪНИ  
Бу сыйлы куън аьр кимге.  
ЮМА СОНЪГЫ  
Сабыр эм де сак оьзи —  
КАТЫ КУЪН ДЕ  
Ямагатта суьйдимли!

Аьне сондай  
Куънлер барды юмада.  
Аьр бириси  
Айтыла халк арада!  
Сыйлайык биз  
Бизим юма куънлерин —  
Олар оьктем  
Тутып тура оьзлерин!

ПОНЕДЕЛЬНИК  
ВТОРНИК

СРЕДА

ЧЕТВЕРГ

ПЯТНИЦА

СУББОТА

ВОСКРЕСЕНИЕ





# Мереке

## Адабиятымыздың Объектмангы...

**А**ыне соьйтип айтпага боламыз ана адабиятымыздың негизин салувшылардың бириси Фазиль Апас улы Абдулжалилов акында. Соьйтип ол бизим ана адабиятамызга оьмир-оьмирге кирип калды. Фазиль Апас улы 1913 йылдың 1 март куьнинде Ставрополь крайнынынъ Минераловод районынынъ Канглы (Куьми) авылында тувган. Ярлы эгинши аьелинде. 1920 йыл атасы Апас Орак авылына (аьли Эркин-Юрт) коьшеди. Оны ман бирге ети ясындагы Фазиль де келеди.

Авыл мектебин битирип, Фазиль Апас улы Черкесск каласындагы педтехникумга туьседи. Мине мунда онынъ яратувшылык йолы басланады. 1930 йыларда «Кызыл Шеркеш» газетасында биринши ятлавы шыгады. Сонъ хабарлар язады эм 1936 йыл автордың «Коьплерден экев» деген повести дуныя коьредди. Сол йыл ок ол «Енъилген явлар» деген пьесасын да язып алган.

Фазиль Апас улы онлаган ятлавлар, хабарлар, дестанлар, повестьлер, романлар язып калдырган эм олар баьриси де халкымыздың сыйлы китаплери болып саналадылар демеге боламыз.

Фазиль Абдулжалиловтынъ «Коьпти коьрген Кобансув», «Шувылдайды Кобансув дестанлары», «Куьшилердинъ аьели», «Асан-

тай», «Аьруьв нышан», «Атадың улы», «Йоллар, йоллар», «Кубашанъ» повестьлери, «Каты агын», «Бес камышы-берекет» романлары савлай ногай халкына белгили болып калганлар эм оралдың биревлери орыс тилине коьширилип, Черкесск, Ставрополь эм Москва каласында да шыкканлар. Олардың биревлерин орыс тилине автор оьзи коьширген.

Фазиль Апас улы Абдулжалилов Карашай-Шеркеш область язувшылар кадрларын аьзирлевге уьйкен косымын салган аьдемимиз. Сыйлы язувшымыз эм шайиримиз Москва каласындагы Максим Горький атындагы Литинститутынынъ йогары курсларын да бириншилерден болып ногайлар арасында оқып битиргенлерден болады.

Фазиль Абдулжалилов РСФСР-динъ эм СССР-динъ бир неше язувшылар съездининъ делегаты да болып сайланган. Ол Уллы Аталык согысынынъ белсен катнасувшысы эм бир неше орденлердинъ эм медальлердинъ иеси де болган.

Сыйлы язувшымыз эм шайиримиз 1974 йыл, яшавынынъ алпыс биринши оьмиринде яшавдан кеткен эм Черкесск каласындагы оьликке коьмилген. Онынъ атын ногайлар яшайтаган ерлерде орамлар да юритедилер.

*С.Култаева.*





Арли шайирдинъ бир неше ятлавларын беремиз


# Наъсип

Юрегимде  
Отты ягып, мен туьстим,  
Яшавымды  
Сайлап алган йолыма.  
Яхшылыкка  
Мырат этип куьрестим,  
Каьлем алдым,  
Савыт этип, колыма.

Йыллар тамам,  
Сувдай, агып кетилер.  
Кырав шалды  
Басымдагы шашымды.

Куллыгыма,  
Арт карамай, бет берип,  
Санамадым,  
Бармак буьгип, ясымды.

Мен билмеймен,  
Пайда халкка бердимме?  
Тек билемен  
Исте болдым мен алал.  
Бирев соны  
Коьрип, анълап билдима –  
Наъсиплимен  
Деп санарга – сол тамам.





Кешелерде  
Калка юрген юлдызлар,  
Шагы етпей,  
Батып энди кетерме?  
Айга тенъли,  
Шынар бойлы яс кызлар  
Кайгы шеккен  
Куьнге энди етерме?

Язлык куьнлер  
Кара туьнге доьнерме,  
Ошакларда  
Бирден отлар собнерме?  
Дерья-тенъиз  
Ягалардан шыгарма,  
Бав-бакшады  
Толкыны ман ютарма?

Кара бавыр  
Буьгуьн сазлы боларма,  
Сазаганлар  
Ямгыр болып яварма?  
Йыр-куьлкилер  
Буьгуьн танъкы боларма,  
Буйырлардан  
Болат-кылыш аларма?

Ах, огырсыз,  
Наьлет душпан, кара яв,  
Батпаяк ты  
Бизим ярык юлдызлар.  
Коймаяк ты  
Йырларын да, билип кал,  
Шынар бойлы,  
Айдай аьруьв яс кызлар.

Алай-аьдий  
Намарт душпан, наьлет яв,  
Собьмеек ти  
Ошакларда отымыз.  
Ярмай сенинъ  
Биз обтинъди, билип кал,  
Шагы етер –  
Кенъ майданды алармыз.

Айхай-аьдий,  
Наьлет душпан, канлы яв,  
Кобьгимизди  
Кара булыт яппаяк!  
Сен яманнынъ  
Карыс мойнын сындырмай,  
Пелван халкым  
Меним тыныш таппаяк!





# Ярыкландырувшыдынъ эстелигине

## Окувлар етимисли оздылар

**И**рманшы оьмирдинъ басында Астраханьде туьрленислер болатан кыйын йылларда фольклор йьновшы Абдул-Хамид Джанибеков соьллеги замангы ногай язбасын туьзген.

«Джанибековтынъ окувлары» тек отчетлы амаллама тувыл. Ол ногайдынъ этнокультурасына ян авырувлы аьдемлердинъ йолыгысы болады. Сонынъ уьшин сосы окувларды озгарув ийги аьдетке айланган эм ярты оьмирдинъ бойында етимисли озгарылып келеятырлар.

Озган йыл Растопуловка селосынынъ ортак билимлендирув мектебинде кезувли кере Джанибековтынъ окувлары оздылар. Оны «Эдиге» ногай яс-явка орталыгы уйгынлаган эди. Йыйылган конакларды уйгынлавшылар ногай шай ман эм боьреклер мен йылы йолыгып алдылар.

Тарыйх илмилерининъ кандидаты Виктор Викторин ногайларга ювык аьдем болган. Ол коьп йыллардынъ бойында окувларда белсинли кат-

насады. Муна йол да бос колы ман келмей, ол «Эдиге» ногай яс-явка орталыгына оьзининъ озгарган тергевлерининъ копияларын савгалады. Аьлим оьз соьзинде орыс тилден ногайшага да коьшип соьйледи. В.Викторин тилди саклавга уйкен эс бермеге керегин белгиледи.


Россиядынъ язувшылар Союзынынъ Астраханъ боьлигининъ етекшиси Юрий Щербаков ногай авторларынынъ орысшага коьширилген ятлавларын окып эситтирди эм «Все до строки, тебе, народ Ногай» деген китапти амалламады уйгынлавшыларга берди.

Тарыйхшы Равиль Ишмухамбетов ногаеведлердинъ йыйынтыгын презентациялады. Йыйынтыктынъ янъы баспаланувы зегенли ногай аьдеми, «Бирлик» ногай ямагатшылыгын туьзувшиси Равиль Джумановтынъ эстелигине багысланган.

Балаларды маданиятка тартув эм тувган тилди кенъ яйылдырув акында Растопуловка селосынынъ ортак







билимлендируув мектебининъ басшысынынъ орынбасары Асель Ишназарова хабарлады.

«Эдиге» ногай яс-явка Орталагынынъ етекшиси Эльдар Идрисов та оз ойлары ман боьлисти.

2018 йылда Абдул-Хамид Джанибековка ярасык эстелик ашылаяк. Ол ярыкландырувшыдынъ яшаган уьйининъ касында орынласаяк. Бу амаллама Абдул-Хамид Джанибековтынъ тувган куьнине багысланаяк. Проект Джанибековтынъ тувганларынынъ демевини эндириледи. Онынъ баславшылары ярыкландырувшыдынъ туьвеншери Марат Джанибеков эм белгили архитектор Абдурахман Махмудов етекшилейтаган «Ярканон» фирмасы боладылар. Эстеликти ашудынъ калыбында ногай ярыкландырувшыдынъ яслык шагы акында театрластырылган коьрсетуув де аьзирленек.

Сондай болып, зегенли суьвретши эм хореограф Сраждин Батыровтынъ яратувшылык йолы акында Арслан Бакиевтинъ туьзген фильми де коьрсетилеек. Ол да Абдул-Хамид Джанибековтай болып, ногайдынъ маданиятын алдыга алып барган аьдем болган.

Суьйтип, Абдул-Хамид Джанибековтынъ кезуьвли окувлары етимисли оздылар.

*А. Найманов.*





# Оьзим тигип уьйрендим...

**Б**ир кере кишкей кеде Эмирбек орам ман авыл ортасында баратаган болыпты экен. Эм ол бирден суьринип йыгылады. Тобыгын авыртады экен. Турып караса – тобыгы заьлим сыдырылган-шорабы да заьлим йыртылган болыпты.

Сонъ ол уьйге кайтады. Бокшадан ийнеди де, йипти де шыгарып алады. Сол вакыт боьлмеге онынъ тетейи кирип калады экен. Эмирбек ога карай берип:

– Тетей, тетей-ав, мага мине шорабты тигип бертагы, йыртылган оьзи, – дейди. – Сонъ оьзи ога йипли ийнеди узатады.

– Оьзинъ тигип карашы, балам, – деп те тетейи айтады эм ога ийнеди кайтарып берип кояды.

Эмирбек оьзи билген кепте шора-

бын тигеди. Аягына киеди эм тагы да орамга ойнамага шавып кетеди. Кеделер эм кызлар шорабын тиккен кебин коьрип селеке этпеге суьдилер эм биревлери куьлеп те аладылар.

Эмирбек эш бир затта кажындамайды эм оларга карап, йигерлене бере, айтады:

– Сиз мага куьлменъиз, бу кезек аьруьв болмаса да, эндигиси йолай кайтип ийги болганын коьрерсиз, мен аьли кайтип тикпеге керегин бираз уьйрендим...

Соннан алып кишкей Эмирбек кийимининъ не ери йыртылса да, оьзи тигетаган болды. Оны коьрип тетеси де коьз астыннан карайды эм баладынъ эткенине оьзи разы да болады.

*Шугаипова З.*





# Анам! Сени сүемен

**М**еним анамнынъ аты Зарема. Ога 40 яс. Ол авылда социальный куллыкшы. Йыл сайын мектебимизде «Ана куьни» байрамшыланады эм мен сол куьнди бек карап тураман. Анама деп энъ ийги соьзлер аьзирлеймен. Анамыз алдында бир оьмир бойы борышлы болып каламыз, онынъ аьр бир уйкысыз кешеси уьшин, аьр бир юзиндеги сызыгы уьшин. Анам мага окув этпеге коьмек этеди, аьр заман да окувга маьне бер деп турады. А мен болсам онынъ соьзлерин ерге туьсиргим келмейди. Анамнынъ тувган куьни 19 карагыста эм мен атам ман ога билезик пен шешекей байламын, ийисли сув савгалаяк боламыз. А билезикке «Зарема» деп анамнынъ аты язылаяк. Анамды калай сүемен, энъ де ийги соьзлер излеймен ога айтпага!

*Альфия Исаева,  
«Тулпар» куьби, 5 кл.*





# Эшки борри мен калай кыррескен

(хабар)

**К**авгадан сонгы авыр йыллар. Аьдемлер ший ярлылар, авызларын ашсалар, оьпкелери коьринеди. Сарыгыз сынъар кызы Алиме мен авылдынъ шетинде басына тобан ябылган ямпик уьйде яшайды. Байы кавгадан кайтпады. Конъысы орыс хуторда Сарыгыздынъ конакбайлары яшайтаган эдилер. Тул хатыннан барларын кызгынмайтаган эдилер. Семён ман Глаша бир барса наьртуьк берер эдилер, экинши йолда дорбасына бутылкага куьнайланмай куйып, бир аяк бийдай ун салар эдилер. Боятен де, уьйдинъ иеси Семён айлак юмарт аьдем эди.

— Глаша, Сонядан (Сарыгызга орыс конакбайлары соьйтип айтаган эдилер) барынъды кызганма, баласы бар, караманълайдынъ байы бизим ушин кавгада кан тоькти, кыйланып яшайды, — дер эди.

Язлыктынъ бир куьнинде Сарыгыз конакбайларына барып келейим деп, хуторга карап йолланды.

— Сени айтып туры эдик, Соня, не аьруьв болды келгенинъ. Биз сага эне-мине козламага турган эшкиди береек боламыз. Кызынъ ман экевинъызге суьт болар, улпасын тарап алсанъ, кофта, явлык согарсынъ. Улаклары сизге калар. Эцки суьт беруьвин токтатса, бизге кайтарарсынъ. Кайтармасанъ да хатеримиз калайак тувыл, — деди Семён.  
— Колайынъа коьре карарсынъ.





Собьитип, бир йол бир ат егетаган дробгининъ артына эшкиди байлап, Семён, касына Сарыгызды да олтыртып, авылга карап йобнеди.

— Соня, эшкимизге Ариша, деймиз. Атын эситкенлей, кайда болса да ол каралдыга ювырып келеди. Адасып-сасып бир ерде де калмайтаган, — деди Семён.

Эшкиди коьргенде, Алиме аягы ер баспай суьйинди. Ол, Ариша, Ариша, деп эшкидинъ кардай ак юмсак улпасыннан, эки муьйизининъ арасындагы айдарыннан сыйпады. Кызалак сав куьн эшкиди уьйдинъ артындагы ясыл оьленде отлатады. Айван да оьзине аьруьв айтканды анълайды болаяктагы. Ариша Сарыгызаларда тувып оьскендей болып, колларына тез уьйренди...

Хутордан келгенли арасы коьп те озбай, Ариша Сарыгызаларга эки аьруьв улак тапты. Эшкидинъ улактары тувганлай, Аришадынъ елини куьннен куьнге уьйкен бола бердилер. Эшки юрсе, елинлери аьри-бери елп-елп этип шайкаладылар. Сарыгыз Аришадынъ увызын савып алып, уьйинде болган унды косып, увыз атуктар писирди. Алиме атуктарды ярататаганын коьрсетип, танълайын кагып ашайды. Сарыгыздынъ эсиннен Семённынъ «Кызынъ бек арык, ога эшкидинъ суьтип ишир», деп айтканы кетпейди. Куьнде де Сарыгыз Аришадан шыккан суьттен стаканга куйып, кызына береди.

Куьннен-куьнге улактар оьседилер. Оьзлери кайдай кытымырлар, каралды ман бир болып, косаяк атып, ойнаклайдылар. Алиме кишкей досларына карап шеги катып куьлейди.

Куьн етип, бакшада оьстирилгенди йыйып алган сонъ, Сарыгызалар

эшки мен улактарын бакшада отлататаган болдылар. Бир йол Алимединъ анасы авылдынъ ана бир шетинде яшайтаган боьлеси Канитат авырган деп, оны коьрмеге бараяк болып, сисеге суьт куйды, писирген атуктарыннан да салды.

— Алиме, каралдыдан шыкпа. Бакшадагы эшкилерди карай тур, — деп Сарыгыз авыздан шыгып кетти.

Анасы айтканынша, бир якка да кептей, Алиме сыякта шиберек тобы ман ойнады, кишкей савыт кабак шелеги мен улактарга сув аькетти. Бир кесек заман озган сонъ, Алиме Ариша бир уьйкен ийт пен алысатаганын коьрип, каралдыды басына кийип кышкырды. Ийт Аришадынъ артында пыскан улактардынъ бирисин сермеек болып, шапшыйды. Эшки балаларын ийттен коршалап узун уьйкен муьйизлери мен анавдынъ курсагына суьзди. Ийттинъ каьзеби улактарда, солардынъ бирисин сермесе экен. Эки янувардынъ алысувларына карап, Алиме тагы да бек кышкырады. Кышкырыкты эситип, конъысы карт Исхак, Саид шавып келдилер.

— Не болган, Алиме, не бек кышкырасынъ? — деди Саид.

— Эне, анда, анда, ийт! — деп кыз тутлыгып соьйлеп, бакша бетке коьрсетти.

Мазаллы, коькшил туьсли териси, узун куйрыгы болган януварды коьрип, Исхак:

— Саид, тез, марже, ол ийт тувыл. Карыскыр, улактардынъ ийсин сезип келген! — деп ашувлы соьйледи.

Артынсыра эр кисилердинъ бириси сенек, бириси казгыр алып, бакша бетке шаптылар. Сонынъ арасында боьри аьлсизленген эшкидинъ елининнен сермегенин





коьрдилер. Саид сенегин боьридинъ курсагына тускап шапты. Ама боьри корадынъ уйкен тесигиннен шыгып кашты.

— Ай-медет, энди ол яман зат бизге яшав береек тувыл экен. Даьмиккен ерине келеек те тураяк! — деп шыбынлады карт Исхак.

Ол Аришадынъ елинин канайтаганын коьрип:

— Саид, эшкидинъ ярасына парзон май якпага керек. Бизим котаннынъ табанына кыстырылган калай кутыкты алып келши! — деди.

Собьтип, Сарыгыз келгенше коньысылары эшкидинъ ярасын ювып, парзон май яктылар. Бир кесек заманнан, ярасы битсе де, Аришадынъ елини курып баслады. Оннан сонъ да эшки Сарыгызаларга эки улак тапты.

Собьтип, Сарыгыздынъ ялантоьс, юмарт конакбайлары авыр, кытлык йылда, тул хатынды кызы ман ашлыктан сакладылар. Сарыгыз Аришады кери иелерине аькетемен дегенде Семён ман Глаша айттырып унамадылар.

— Соня, сол эшки мен сен бай, биз ярлы болаяк тувылмыз. Суьйсенъ оны сат та, акшады керегинъе ярат, — дедилер конакбайлар бир авыздан.

Собьтип, бергенинъ колы курымас дегенше, хутордагы конакбайлары авылдынъ кайгадер аьдемлерин аш оьлимнен куткардылар. Авыл аьдемлери де хутордагылардан бар затларын кызганмадылар: матакуя пыслак шыгарып, калакай, локум писирип аькететаган эдилер хутордагы досларына.





# Хатын-кызлардынъ яратувшылыгы

Фазу Гамзат кызы Алиева 1932 йыл 5 декабрь куьн Дагыстаннынъ Хунзах районунынъ Гиничутль авылында тувган. Мектебте окыйтаган заманыннан алып ятлавлар язып баслаган. Бас дегенде Махачкаладагы хатын-кызлар пединститутын, сонъ Москва каласында Максим Горкый атындагы Литинститутын битирген.

Оьткен 2017 йыл тувганлы 85

йыллыгы ман байланыслы Махачкалада Дагыстыннынъ халк шаьйирине шатлык аьлде эстелик ашылды. Аьли сосы сквер онынъ атын юргистеди. Фазу Алиевадынъ ятлавларын ногай тилине Кадрия, Анвар-Бек Култаев аз коьширменлер.

Шаьйир юзден артык китаплердинъ авторы болады.

Фазу АЛИЕВА

## Неше кере

Неше бир мынъ  
Мен ятлавлар язганман.  
Мен сол шаклы  
Яшав оьттим оьмирде.  
Не шаклы бар  
Менде куьш эм куват та,  
Сол шаклы бар  
Юлдыз яктым куьнимде.  
Не шаклы бар  
Кыйналув эм эрисувь,  
Оьрге кеттим,  
Сонъ туьскенмен тоьменге.  
Булар баьри  
Янъы юлдыз юриси –  
Яде авув  
Тастай болып бу ерге...  
Мен йыламай  
Эм йырламай турмайман.  
Сав оьмирим  
Яшав йолын оьтип мен,  
Неше шаклы коьз  
Коьрмеген айкасув ман,  
Аьр куьн сайын  
Юрек шыдап юргенмен!



*Аваршадан коьширген Ан. Култаев*





# Астраханнынъ суьврети

Меним каламда  
Бир ыспайы бар уйлер,  
Ярасыгы  
Кобьдинъ явын бийлеген.

Каналларда  
Туьрли туьсли коьпирлер,  
Эсиклери  
Мык урылмай беклеген!

Астраханнынъ  
Кобь бурынгы орамы,  
Йырлай олар  
Эм суьвретлер устасы.

Орамлардынъ  
Таьрийхлерин окып мен –  
Сосы калам  
Ыспайы деп, билемен...

Саклайык биз  
Энъ де баа, аьруьв деп,  
Кала коьркин,  
Обьмир-обьмир керек деп.

Астраханнынъ  
Баа мага суьврети –  
Эм ондагы  
Ярасыклы аьр бети!





# Аьдемлер де ТУЪРЛИ-ТУЪРЛИ...

Аьдемлер де  
Туърли-туърли:  
Биреви ашувлы,  
Биреви куълкили,  
Биреви ярасык,  
Биреви ишен,  
Биреви тирев,  
Биреви бийик,  
Биреви маштак,  
Биреви урсыскак,  
Биреви коркак,  
Биреви мактаншак,  
Биреви узын,  
Биреви тыйын,  
Биреви йигит,  
Биреви кийик...  
Биреви дос,  
Биреви кос.



Кайдай болсын инсанлар,  
Мен айтайм: болсынлар.  
Суйсинлер бир-бирисин,  
Анъласынлар куълкисин,  
Сыйласынлар суййимин!  
Аьдемлер туърли-туърли!..

*Орыс тилинен коьширген А.Култаев.*



# Аты белгили язувшы эм алим

**Д**агыстанда тувыл, онынъ тысында да аты ийги белгили язувшы эм алим Камал Ибрагим улы Абуков. Сосы куьнлерде ога 80 ясы толып туры.

Камал Ибрагим улы 1838 йыл 2 март куьнинде республикамыздынъ Хасавюрт районынъ Чагаротар авылында тувган. Филология илмилерининъ докторы, профессор эм онавдан артык проза китаплерининъ авторы. Онынъ язганлары Москвада, Махачкалада эм баскалай ерлерде баспаланып келгенлер. Илми куллыклары савлай элимизге де белгили.

Камал Абуков СССР-динъ эм РСФСР-динъ бир неше съездлери-

нинъ делегаты да болган. Дагыстаннынъ язувшылар Союзынынъ правление члени.

Онынъ пьесалары коьплеген театрларда салынып турадылар. Абуков ногай язувшылары Суьйин Капаев, Иса Капаев, Кадрия эм баскалары ман ийги байланысы болган язувшы эм алим. Олар акында бир неше илми куллыгын язган эм баспалаган демеге керек.

Биз оны келип турган сыйлы мерекеси мен ак юректен кутлаймыз эм ога эндиден армаган да онъайлыклар йорамага суюемиз.

Яша, Камал, юз яша! Сен дайым да бизи мен!

Камал АБУКОВ

## Айшаттынъ кыйыны

(хабар)

**А**йшат балалар бавына баратаганда да, окып та, азып та билетаган эди. Сол саялы оны 6 ясында мектебке бергенлер. Салса салсын, кыздынъ тептерлеринде аьр куьн сайын каьтелер табылатаган эдилер. Каьтелер дегенде де, енъил соьзлерде йибериленген, ашыктан-ашык каьтелер. Бир де, эки де йолга койып турган окытувшы Зарипат Батыровна сонъында шыдамады эм Айшатка аьйип этти:

— Дерислерден пайынъ йок, дайым баска, мектебен тыстагы затлардынъ акында ойлайсынъ кусайды.

Айтпага эрши зат, — дайм да эснел турасынъ. Авызынъа шыбынлар кирип—шыгып турадыларма аьши?

Окувшылар куьледилер. Айшат кызарды, онынъ кирпичкери ойнап—ойнап йибердилер.

— Коьзлеринъ де коьп уйкалайды, бир де баска тувылсынъ, кухняда соган туврайтагандай... Мен ше билмеймен сага не амал этеекти де...

Бир юмадан завуч хатын Айшатты такта алдында токтатып, дерисин бере баслады:

— Сизинъ аьел мен баьри де сукланады. Атанъ заводта инженер,





Москвада оқып келген. Ананъ да йогары билимли экономист. Ада-насларынъ да ийги белгиге оқыдылар. Оьзлери спортсменлер... Тек бир сен аьелдинъ сыйын алып келетаган.

Завуч тавысын коьтере берип, кызга аз соьзлер де айтпады. Аягы ман полга урып алды.

Айшаттынъ сепкил якларында коьзяслары йылтырадылар.

— Айт аьши, энди не мыраданъ барды?

Айшат бирден партасына барып дорбасын алды да эм, елдей болып, класстан шыгып кетти...

Экинши куьн Айшат мектебке келмеди. Зарипат Батыровна да, завуч та Айшаттынъ ата-анасын шақырмага токтастылар.

Шақырмага да шақырдылар.

Уьйде ата-анасы урсыспай, аьйи-племей оьзи минен хабарлав эткенде, Айшат сырын шешти.

— Язув дериси мектебте ызгы дерис болады. Сол заман биз балалар бавында уйклайтаган эдик... Мектебте болса занъ артыннан занъ...

Айшат ата-анасы ман оьз арасында мектебтинъ басшыларына язув деристи алдыга салып, йырлав, сувврет, физкультура кимик кужырлы дерислерди артка салмага маслагат этеек болдылар.

Айшат эндигиси мектебке суйине турып баратаган болды.

— Окувларша бир зат та кыйын болмаган экен, — деп, айланганда ол айтып эм куьлемсиреп те алады.

Балалар да онынъ эткен кыйынына разы экенлерин билдирмей болмайдылар...

*Кобширген С. Култаева.*





# Ана эм хатын-Кызлар акында

\*\*\*

Ана бар бала, етим болмас.

\*\*\*

Бир анадан тувган балалар баскаша боладылар.

\*\*\*

Кыскаяклы – аьелдинъ сеними.

\*\*\*

Анага балалар – онынъ бес бармагындай.

\*\*\*

Берекетли кыскаяклыдынъ сыпырасы толы турар.

\*\*\*

Оьгей аналы бала, наьсипсиз бала.

\*\*\*

Кыз бала ят уьй уьшин тувады.

\*\*\*

Каарлы хатыннынъ эри тез картаяды.

\*\*\*

Аьелди аьел этетаган – кыскаяклы.

\*\*\*

Хатын-кыз ыспайы болмаса да, акыллы болсын.

\*\*\*

Анасы кайдай болса, кызы сондай.

\*\*\*

Хатын эриншек болса, эр киси наьсипсиз болар.

\*\*\*

Хатын табылар, ана табылмас.

\*\*\*

Ананъ – сенинъ коьзлеринъ.

\*\*\*

Куртка бар ерде, ийне де болар, йип те болар.

\*\*\*

Ана да эм сенинъ коьзлеринъ де сени куьнлемес.

\*\*\*

Кеше коьрген кызга куьндиз де бир кара.

\*\*\*

Ана артыннан алты ай юрсенъ де арымассынъ.

\*\*\*

Алтын да, арба да табылар – ана табылмас.

\*\*\*

Анага авыр соьз айтпанъыз.

\*\*\*

Анадан сонъ ашшы ман таьтлиди айырарсынъ.

*Аьзирлеген А. Утеев*





# Мен де билмеймен

Уйдеги абелди язбага келген абдем баладан сораиды:

- Сенинъ атынъ ким?
- Мен Ахмед, – дейди кеде.
- Сага неше йыл, Ахмед?
- Мен билмеймен.
- Кайтып сен билмейсинъ? Абдем озининъ неше ясында экенин билмейтаган болаяк?

– Дурыс, меним де кужырым келеди, акай, сол затка. Эгер мен йыласам, мага булай дейдилер: «Мунадай уйкен кедеге йыламага ярмайды», – деп. Эгер мен кыдырмага суйсем, мага: «Сен абли де кишкей, бармаксынъ».

Сонынъ ушин мен де билмеймен.





# Бизим дирет

**А**ыр йыл сайын мектепти биткен, окувшылардынъ йолыгыс-байрамы совет йылларынан алып узилмей, аз болса, яркынлы, куванышлы, эстеликли болып кайсы мектебте де оьткерилип келеди. Йолыгыс-байрам, элбетте, мектепти биткен аьр яска да, самайы агарган эсли аьдемге де аявлы. Аявлы болмайма, эгер узак йыллар куьн оьткермей таьтли бала шагыннан алып бир мектебте, бир класста, бир боьлмеде, бир аьелде бир де шашырамааяктай болып оқып-яшап келселер. Тенълес йолдасларынъ, абырайлы, билимли, аьрекетли оқытувшыларынъ, оьсе келе юрек толкыткан, уялшан ян сезимлерин, кайбир мезгиллерде класс етекшилери мен куьплесип олтырганда ашып боьлискен ой-мырадларынъ, тенъдосларынънынъ енъил кажавлары, даврендируевлери, яслыктынъ емис бавындагы япалак-япалак ак шешекейлерге секинли телезиген уьмитлеринъ сагындай тизилисип эсинъде турса. Кайдай умыткысыз шак! Кайдай таьвекелли шак!

Бизим дирет (выпуск) 1968-нши йылдыкы. Ол йылларда Ногай районнынъ авылларынан коьп балалар Терекли-Мектебке

А.Ш.Джанибеков атлы мектебке окумага келетаган эдилер А.Ш.Джанибеков атлы мектеб ол

йылларда аьлиги Кадрия атлы мектебтинъ мекенинде орынласкан эди. Коьп авылларда баслангыш мектеблер эди. Баслангыш класстардагы оқытувшыларымыз аьриплерге, аьриплерден соьзлер курамага уьйреттилер, эсаптынъ сырлары «косса, шыгарса, арттырув (керелев), боьлуьв (пайлав)» деген анъламлар ман таныстырдылар, табиаттынъ нышанларын айырып билдирдилер.

Бизим дирет – ол 10 «а» эм 10 «б» класстар эди. Биз оьзимиз 10 «а» класстан эдик. Ол заманда мектебтинъ етекшиси Лукманов Хайрудин Аджидаирович эди. Бир йорыкка бизди таьрийхтен эм ямагат туьзилиси (обществознание) дерислериннен оқытты. Класс етекшимиз Зинаида Васильевна Джангазиева эди. Ол бизди 5-нши класстан 10-ншыга дейим немисшеден оқытты. Элбетте, 5-ншиден 10-ншы класска дейим коьп оқытувшылардынъ бизге ак кыйыналары тийдилер. Олар – Валенна Владимировна, Константин Моисеевич, Сталинат Кожухметовна, Борис Аркадьевич, Каирбек Зулъкапиевич, Надежда Романовна, Оьлмес Кусеповна, Балбек Аджибайрамович, Динислам Юсупович, Жорж Юсупович, Бектемир Мурзаевич, Махмуд Абдулсатырович, Василий Михайлович эм баска аявлы насыйхатшыларымыз. Кайбир оқы-





тувшыларымыз еннетли дуныяда.  
Яткан ерлери улпа болсын.

Элимиздинъ аьвлеси шет-  
кырыйсыз. Диретимизден айырым  
бир тенълеримиз наьсипли бак-  
тыларын алыс ерлерде таптылар.  
Хыйлымыз, «тувган ердинъ куьни  
де аьруьв, туьни де аьруьв» – де-  
генге усап, окув-билим алган сонъ,  
суьйикли кеспилерин байырлаган  
сонъ, шоьрегин тувган шоьлинде  
излестирди. Гапарова Света, Ад-  
жиева Саниет 40 йыллардан артык  
тис авырувдан эмлевши усталыгын  
белсенли толтырып келеятырлар.  
Джумаев Солтанбек, Нургишиев  
Янтемир айтувлы бизнесменлер  
болдылар, районнынъ ямагат яша-  
вында да катнасып байыр карыж-  
лар ман канагатлайдылар. Джума-  
гишиева Алтынбийке, Межитова  
Марипат эм баска тенълес кыска-  
яклыларымыз узак йыллар оқы-  
тувшы исин уьстинликли юритип  
келдилер, бай сулыптарын яс оқы-  
тувшыларга асабалыкка калдыр-  
дылар. Отарбаев Рашид, Аджиман-  
бетов Амирхан, Кулунчаков Ильяс  
совхозларда механик, инженер  
куллыкларын етимисликлер мен  
юриткенлер. Баубекова Кураскан  
райпо тармагында ислеп, сыйлы  
куллыкшылардынъ бири эди. Так-  
ташев Рафик районнынъ финотде-  
линде, Акманбетов Амирхан юрист  
дежежисинде ислеп эл арасында  
оьрмет казанып келдилер. Соьзсиз  
де, кайсы окувшы да, кайсы арка  
да, кайсы дирет те насыйхатшыла-  
рын йылы сезимлер мен эскереди-  
лер, оларга ак юреклериннен тек  
яхшылык сагынадылар.

**Окытувшы! Окытувшымыз!  
Дайым сизге разылыгымыз.  
Алтын аьриптен ак атынъыз!  
Иемиз энъкейип басымыз!**



**Куьнлеринъиз болсын ызасыз,  
Оьмиринъиз аксын сыркавсыз.  
Сиз эккен байтерек – аркалар,  
Эл эрлери болдыша олар.**

**Окытувшым! Аявлым, аьзизим!  
Янга якын ашык сыпатынъ.  
Куваныштан яйып кушагын,  
Шугыллайды буьгуьн балларынъ.**

**Минеше суьлдери мектебинъ!  
Бесиги ол баьри оьспирдинъ.  
Сизи мен бактылы бу мекен,  
Кенънен кенъ яхшыды этеген.**

**Алтын окалы ак атынъыз!  
Айтамыз дайым саламымыз.  
Баягыдай, баладагыдай,  
Сырласайык, окытувшымыз.**

*Канъытар айдынъ 16-сы,  
Такташев Рафик,  
Джумаев Солтанбек,  
Капланов Алибек.*





# Кара мысык эм албаслы

(эртеги)

**Б**ир орманлыкта кара туъсли мысык яшаган болыпты экен. Аты Васька болган дейдилер. Алды кере сосы мысык авылда яшаган оззининъ иеси мен бирге. Кайбир заманларда шышканлар ыслаган, ят мысыкларды азбарыннан кувып шыгарып йиберетаган болган. Бир-бирде кусларга да анъшылав этип турган экен. Иеси ога суът берген, каймак та берген. Иеси куллыктан арып келип олтырган заманда, оны алдына алып олтырып та туратаган болыпты экен. Мысыкты аьр заман басыннан сыйпаган. А мысык болса, иесине явапка оззининъ мыр-мыр йырын йырлайтаган болган. Заман келеди эм мысык картаяды. Куъши таяды. Эндигиси шышканларды ыслап болмайды. Эндигиси мысык тек исси пештинъ янында ятып турмага суъеди. Уйклап турса, иесиннен ашамага тилейди. Кайбир шакларда савыттагы суътти де тоьгип алады эди.

Бир кере Васька мысык тагы да савыттагы суътти тоьгеди. Иеси кыскааяклы ога бек ашувланады эм оны азбарыннан кувып йибередиди.

— Кет муннан. Карайман, сен аьли яравсыз болып баслайсынъ. Суътти тоьгесинъ, шышкан ыслап болмайсынъ. Аьр заман уйклайсынъ, — дейди ога.

— Суыйген еринъе бармага бола-яксынъ. Меним карсылыгым сага йок.

Кара мысык иесине оьпкелейди эм азбардан шыгып, суыйген ягына карап абытлайды. Авылдынъ тоьгегинде коьп айланады. Бирде шышкан ыслайды, бирде кусларга ювырады. Туъсинде ога йылы пеш энеди.

Бир кере мысык калын орманлыкка барып калады. Онда ол терен шукур табады эм онда яшап баслайды. Орманлыкта онынъ яшавы осал тувыл эди. Шышканлар да барлар, куслар да табыладылар. Энь де маьнелиси — оны бирев де коьрмейди эм ога бирев де урсыспайды. Булай алып караганда, аьруьв. Тек яй кетти. Куслар йылы якка уштылар, шышканлар болса, инлерине кирдилер. Васькага сувук болады эм ол аш болып баслайды. Куьзги ямгырлар тез-тез явадылар.


Бир кере кара мысык оззининъ ининнен шыгаяк болган эди, болмады. Куъшли кар явган эм иннинъ авызын да япкан. Ол сувуклыктан калтырайды. «Мага эндигиси йылы валенки эм колгаплар болса, бир зат та керек тувыл эди. Кыстан да аман шыгар эдимтагы», — деп ол ойланады.

Бир кере кара мысык орманлыкка кирип кетип калмаспа. Караса — онынъ алдында тавык аяклы бир кишкенекей уый туры. Оьзи де тавык болып кышкырады эди. Мысык суыйинди эм ога ювырап барды. Кишкей уый оны оззине йибермейди.

Кишкей уыйге калай кирмеге керегин ол ийги билетаган эди.







Эм оны ман пайдаланмага токтасты. Эм ол кишкей уйге карап айтып баслады:

— Сен кишкей уй, мага алды бетинъ мен кара, аь мен болсам, сага арт бетим мен бурылып карарман.

Кишкей уй ога алды бети мен караганлай, онынъ эсиги ашылды эм мысык ювырып кирип калды. Васька боьлмеге де киреди. Онда йылы. Пештинъ бир муьйисинде йылы валенкилер эм колгаплар да барлар. Тамам ога тигилген экенлер. Васька валенкиди кийди эм пештинъ янында ятып уйклады. Оьзининъ билген йырын да йырлайтаган эди. Сонъ каты кепте уйклап калады.

Айтпага керек, сосы кишкей уйде албаслы хатын оьзининъ йиен кызы Варвара ман яшаган. Олар бирге ушадылар эм кишкей балаларды коркытадылар. А Васька каты уйклавда эм туьс те коьрувде. Ол сондай да бир каты уйклаган эм уйге кайтып албаслы куртка эм йиени келгенин билмей де калган. Олардынъ аьр бириси

оьзи мен узак авылдан тавык алып келген эди.

Олар уйге кирдилер. Йорыгына ок ким ди бирев мунда барын сезбей болмадылар. Албаслы куртка баслайды:

— Фу-фу-фу! Кимди аьши бизим уйдеги? Мага коьре мысыктынъ ийиси келеди-ав! Бурынымды ярып алып бараятыр сосы ийс!

Уйдинъ муьйисинде ол мысыкты коьрип калды. Онынъ елкесинен ыслады эм айтты:

— Ким сени мунда аькелгенди?

Кара мысык албаслы курткадан коркты эм ырыясып онынъ тоьгерегинде айланды, куйрыгы ман ондамунда булгады.

— Албаслы-абай, мен мысык боламан. Мен яман тонъдым эм сизинъ уйди коьрип калдым. Ол мени оьзине йиберди. Тилейман сага, албаслы-абай, мага мунда яшамага ыхтыяр бертагы! Мен сизинъ уйди каравыл этермен, ят биревди де йиберман. Куварман. Баьри зат та яхшы болар мунда!

Албаслыга бу мысыкка дейим абай деп ийги соьзди бирев де айтпага эди. Эм ол соьз ога ийги эм йылы болып тийди. Ол мысыктынъ аркасын катлы колы ман сыйпады эм ога яшмага ыхтыяр да берди.

Сол заман йиен кызы Варвара ашувланды эм оны кувмага керек деди. Бизге мундай арыксымал мысык неден керек? Кетсин суьйген ерине!

— Йок, — деди сонда албаслы. — Яшасын бизим уйде. Шышкан ыслар, кусларды кувар. Ятлар келсе, биревин де ювык йибермес бизим уйге карап.

Аьне сол заманнан алып мене куьнге дейим сосы кишкей уйде албаслы, онынъ йиени эм кара мысык бирге яшайдылар. Ятлардан меканды саклайды. Арада бир шышкан да ыслайды эм ашайды.

*Кобширген С. Култаева*





# Ийги хабарлары

(хабар)

**Б**изим аявлы эм сыйлы болган йиенлеримиз Камильге эм Каримге бугуьн тувган куьнлери деп, баьри ювыкларымыз йыйылганлар эди. Бирисине бес ясы эм экиншисине уьш ясы толып туры. Олар оьседилер, акыллары олар ман бирге Аллага шуькир! Азбарда ойнай турып, олар биринши болып азан сесин эситип аладылар. Биледилер, дува окув басланмага керек. Аьне сол заман олар, ойындарын койып, уьйге атайга кышкырып ювырадылар: – Атай! Атай-ав! Азан! Азан! Балалар келип терезеден атайлары эсиптей коймага болатаганын да анълайдылар. А дува окумага керегин эм ол борышлы экенин биледилер: мусылман аьдеми азанды йибермеге кереги йок. Атай да йиенлерине разылыгын билдирмей болмайды. Эм ол оьзининъ дува окувында Алладан аьр заман кишкей балалары

уьшин ден савлык, онъайлык тилеп турады эди. Оны кишкей йиенлери де эситедилер. Биледилер, бу тилек олар акында экенлерин де.

Эм олар-оьсин, келеятырган кишкей йигитлер, ийги хабарлары ман сосы яшавда яшасынлар эм аьр заман да болсынлар деп, кайтаралап та алады... Атай ман Камиль де эм Карим де оьктемсийдилер...






Сувреттерде юмактардын  
яванлары, оларды шешинчиз  
эм бодунчиз




Пуссе асылк азбарга,  
Кырт-кырт этип ашарман.  
Мысык «атса» коьз мага  
Пестике мен кашарман.

Мен арслан да тувылман,  
Мен каплан да тувылман,  
Мен тырнакай атлыман,  
Мйтке айлак каптыман.





Атыл-тапыл аяклы,  
Поксан тогыз таяклы.  
Дос боларсынъ ога сен,  
Постакай ман суът берсенъ.



«Тыре» дегенде, тик турды  
Эки кулак ялма-ян,  
Каргып бирден ювырды  
Карлы кырда ак ....



# Майнесин шешип, явабын беринъиз...

\*\*\*

«Лашын» журналын окыйтаган эм алатаган йолдасларга буьгуьн биз мунавдай тапшырмады бермеге суьземиз: тоьмендеги такпаклардынъ майнесин шешип карамага эм онынъ явабын редакцияга коьрсетилинген адреси мен йибермеге. Эм ким де сосы такпаклардынъ явабын дурыс кепте шешип, явабын йиберсе, редакциядан тегин йосыкта журналды алмага амаллы болып калады.

\*\*\*

1. Алтын – отта, эр яшавда билинер.

\*\*\*

2. Аьдем соьзде тувыл, исте сыналар.

\*\*\*

3. Йигитке мынъ туьрли оьнер де азлык этер.

\*\*\*

4. Билген билгенин ислер,  
Билмеген бармагын тислер.

\*\*\*

5. Яшав кыйын болмай, тыныш болмас,  
Кыйынлыкка болмас киси шыдамас.

\*\*\*

6. Анадынъ коьз ясы да алтыннан баады.

\*\*\*

7. Билеги юван бирди йьгар,  
Билими юван мынъды йьгар.

\*\*\*

8. Ошакта от соьнемесин.

\*\*\*

9. Авылдасынъ ким болса, адасынъ сол  
болар.

\*\*\*

10. Юз майнет болганнан, юз досынъ болсын.

*Аьзирлен С. Култаева.*



## Соколёнок Лашын

2/2018

**март - апрель**

Иллюстрированный детский журнал.  
Издается один раз в два месяца.

**Учредитель**

Министерство печати и информации РД.

Регистрационный номер  
ПИ №ТУ05-00348 от 01.12.2016г.  
выданный управлением Роскомнадзора  
по Республике Дагестан.

Издается с января 1990 г.

**Руководитель – главный редактор**

Мурад Ахмедов

**Редколлегия:**

А.Исмаилов (зам. гл. редактора)

Т.Зургалова (отв. секретарь)

А.Култаев

Б.Кулунчакова

М.Авезов

С. Майлыбаева

С. Култаева (редактор выпуска)

**Художественный редактор** З.Даганов

**Технический редактор** Т. Лузина

**Художник номера** А. Самарская

Формат 60x84 1/8.

Уч. изд. л. 3,16.

Уч. печ. лист 3,26.

Бумага офсетная.

Выход в свет 12.04.2018 г.

Тираж 308 экз.

Заказ №182.

**Типография:**

ООО «Издательство «Феникс».

**Адрес типографии:**

367018, РД, г. Махачкала, ул. Петра I, 61.

**Редакция и издатель:** Государственное

бюджетное учреждение Республики

Дагестан «Редакция республиканских

литературных журналов «Соколёнок»

и «Литературный Дагестан».

**Адрес редакции и издателя:**

367000, РД, г.Махачкала,

ул. Даниялова, 55.

**Электронный адрес редакции:**

litdag@mail.ru

Ногайский язык.

Индекс: на год - 63238,

на полугодие - 78432.

Цена свободная.